



**E**genolphus natus est ex illustri familia domini norum Rupeſpoletanorū (quos hodie Rappolsteinios uocant) patre Huldrico egregio Heroe, & matre Anna Alexandria comitissa Fürstenbergica, 27 Augusti, anno salutis millesimo quingentesimo uicesimo septimo. Hunc parentes à teneris annis bonis literis & omnis generis uirtutibus educandum curarunt. Cum autem pater anno etatis eius quarto fato fungeretur, Vuilhelmus auus nepotis curam suscepit, & ut optimè educaretur, prospexit. Postea quoq; cum adoleuisset, auitis ditionibus præfecit, & ut cunctis gratissimus esset instituit. Cum itaq; ætatis anno uicesimo auus multorum luctu decessisset, Egenolphus magno animo auitas uirtutes imitatus, suam prouinciam magna laude gubernauit, & multis corporis & animi uirtutibus conspicuus fuit. In primis uero Euangelij doctrinam amauit, & nullius insidias ueritus, eam confessus est. Literarum quoque patronus existens, proprijs sumptibus multos pauperes in Academijs aluit, ut instructiores postea ad Ecclesiæ ministeria peruenire possent. Quin etiam mea studia egregie iuuit, & aliquoties, ut meis lucubrationibus pergerem, incitauit.